



SEORANG anggota penguat kuasa SWCorp melihat salah satu tempat pembuangan sampah haram di Negeri Sembilan baru-baru ini.

Operasi berjaya denda pesalah RM172,000

120 lokasi sampah haram di N. Sembilan

Oleh **ZAKKINA WATI**
AHMAD TARMIZI

SEREMBAN — Sebanyak 120 tempat pembuangan sampah haram dikesan oleh Perbadanan Pengurusan Sisa Pepejal dan Pembersihan Awam (SWCorp) Negeri Sembilan dalam operasi penguatkuasaan yang dijalankan sepanjang tahun lalu.

Pengarahnya SWCorp Negeri Sembilan, Mohd. Zahir Shari berkata, daripada jumlah itu, sebanyak 40 lokasi berada di daerah Seremban, diikuti 37 tempat di Nilai, Port Dickson (13) dan Rembau (10).

Daerah Tampin dan Kuala Pilah pula masing-masing lapan lokasi tempat pembuangan sampah dan diikuti Jempol (3) dan Jelevu (1).

“Kesemua lokasi terbabit telah diambil tindakan untuk pembasmian dan pembanterasan sampah haram,” katanya dalam satu kenyataan semalam.

Katanya, sepanjang tahun lalu, anggota penguat kuasa SWCorp negeri ini telah menjalankan sebanyak 199 operasi penguatkuasaan tempat pembuangan sampah haram.

Ujarnya, hasil pelaksanaan Operasi Intip dan Cekup, sebanyak 12 kes pembuangan sampah haram telah berjaya didakwa di mahkamah dengan nilai denda berjumlah RM172,000.

“Sebanyak 12 kes masih lagi dalam siasatan, manakala dua kes sedang dalam proses pendakwaan di mahkamah.

“Kesemua kes ini diharapkan dapat menjadi pengajaran kepa-

da masyarakat agar tidak membuang sampah di lokasi yang tidak dibenarkan,” katanya.

Mohd. Zahir menjelaskan, pihaknya sentiasa melakukan pemantauan dari semasa ke semasa bagi mengesan dan menangkap pihak yang melakukan pembuangan sampah haram.

Katanya, tindakan penguatkuasaan dan pendakwaan yang tegas oleh SWCorp adalah penting dalam usaha memastikan kegiatan pembuangan sampah haram yang menyebabkan kacau ganggu dan pencemaran kebersihan persekitaran dapat ditangani dengan lebih berkesan.

“Komitmen SWCorp dalam menguatkuasakan Akta 672 adalah demi memastikan agenda Dasar Kebersihan Negara dapat dijayakan,” ujarnya.